

摘藻堂四庫全書薈要

集部

欽定四庫全書薈要

集部

元詩選初集卷二十四



欽定四庫全書薈要卷二萬三百八十四

集部

元詩選初集卷二十四 長洲 顧嗣立 編

許有壬圭塘小藁



有壬字可用彰德路湯陰人年二十暘師文薦入翰林不報授開寧路學正登延祐二年進士第累官參議中書省事元統二年九月拜參知政事至正初轉中書左丞六年召為翰林學士承旨改御史中丞以病歸起河南行省左丞十五年遷集賢

大學士復拜中書左丞尋兼太子左諭德十七年致仕給俸賜終其身越七年卒年七十八謚曰文忠可用歷事七朝垂五十年有元詞人由科舉而登政府者可用一人而已當權臣恣睢稍忤意則誅竄隨之可用絕不為巧避計善筆札工辭章歐陽元功序其文以為雄渾閎湧如層瀾迫而求之則淵靚深實其深許之如此揭曼碩云相下許公文章譽望矯然為當世名臣而扈從上京凡志

有所不得施言有所不得行憂愁感憤一寓之於
酬倡晚年得康氏舊圃出所賜金買之名曰圭塘
別墅昆弟翁季賓客留連觴咏其間酒酣賦詩頃
刻成什傳於四方所著至正集百卷其弟有孚別
輯其詩為圭塘小藁序之曰至正集卷軸浩繁以
猶子楨起遣南行倉卒不及收拾有孚為輯小稿
并平生倡酬紀行諸作為別集以傳於世

神山避暑晚行田間用陶淵明平疇交遠風良

苗亦懷新為韻十首

田塍晚獨策及此時雨晴東畦與西疇
決決流水聲豐年已足歡清風復多情
歸來藉草坐濁酒還自傾不用澆礪磊
我懷無不平

寢迹非絕世雅志便林丘青山足一至
勝處靡不游意適輒忘返茲焉夏已秋
遙遙目力窮青青盡田疇迷復幸不遠
歸歟無異謀

脫身豪俠窟里氓締新交愛其心無
窮不較醉語謔生

兒更有教治地盡肥境禾黍已在眼瓜蔬早登庖愧子
良已多況敢希由巢

浮生若無惊道近人自遠重外樂徇身遺世幾赫咍老
農初不知遑遑歲年晚清晨負耒出日夕行歌返悠悠
千載心它人莫予忖

落日照我影頽然溪水中涼颺動絺衣勢欲凌虛空顧
之一大笑與爾將無同昔也爾何達茲焉爾何窮莫道
山林陋乃有黃虞風

昔人植松柏映蔚彌崇岡不為朝夕利千載當自長植
槿非不榮我圃因之荒白髮走畏途途修馬非良桑榆
賴未晚此樂且無央

靜念少日事躁中劇耨苗欲令千載淳反之在一朝斥
鷃不自量上欲搏扶搖世態任盲俗林譏愧清謠傲骨
日已長及辰事道遙

淵明昔歸休開歲纔五十我雖年近似我道慚什百兼
金與尺璧敢取儕瓦礫緬馬動真想迅往孰誘掖庶幾

歸田園千載可同迹

我聞昔桃源民風近無懷茲山亦深窈中有讀書齋但
絕車馬迹不惜雲烟埋旁圍靡靡山上蔭高高槐聊以
永今朝得酒從無媿

我髮日以變山色日已新舉杯試問山古今閱幾人我
非山主人聊為山之賓杖可入幽險詩能寫清淳但恐
我它適山乎爾誰鄰

應制天馬歌

臣聞聖元水德正色在朔方物產雄偉馬最良川原飲
翫幾萬萬不以數計以谷量承平雲布十二閑華山百
草春風香又聞有駿在西極權奇倣儻鍾乾剛茂陵千
金不能致直以兵戈勞廣利當時紀述雖有歌侈心一
啓何由制吾皇慎德邁前古不寶遠物物自至佛郎國
在月窟西八尺真龍入維繫七逾大海四閱年灤京今
日才朝天不煩翦拂光奪目正色呈瑞符吾玄鳳翥龍
臆渴烏首四蹄玉後駉其前九重喜見遠人格一時便

勅良工傳玉鞭錦韉黃金勒瞬息殊恩備華飾天成異
質難自藏志在君知不在物方今天下有道時絕塵詎
敢稱其力臣才罷駕亦自知共服安輿無罃軼

題友人所藏明妃圖

臂香骨沁守宮虐金鎖重門怨銀鑰深宮有眼不識春
晝長時聽雲間樂平生所見惟監宮今朝豈期見畫工
君王知畫不知妾薄命已分如秋蓬黃沙漫漫天無窮
驚飈吹老紅芙蓉穹廬明日又何處此生遂負南歸鴻

和親納侮號上策建議詒謀要敬責妾身雖苦免主憂
猶勝專寵亡人國關山寥落夢亦迷嫁雞正爾隨雞飛
人間生女莫望貴只可近作田家妻琵琶聲斷霜天月
青塚至今青不歇後來却有蔡文姬千古胡笳辱哀拍

喜逢口 并序

灤陽驛東北四十里有雙塚世傳昔有久戍不歸
者其父求之適相遇此山下相抱大笑喜極而死
遂葬於是俗因謂之喜逢口亦猶望夫之有石也

雖莫究其世代姓氏而其言有足感人者故作是以紀之

兒寒解衣重撫摩兒飢推食孰忍訶長成與國遠負戈
一去不返當如何去時云戍東北鄙直出榆關度遼水
白頭郎罷與影俱豈憚山川千萬里天教此地適相逢
父曰從天墜吾子笑疲樂極俱殞身誰謂情鍾遽如此
官家開邊方未已同生又別寧同死山雲漠漠風颼颼
山頭雙塚知幾秋當時不忍一朝喜今日翻飛千載愁

猶勝負女化為石終古孤身雙不得清江寒影日悠悠
行人一去無消息

哀棄兒

雪霜載途風裂肌有兒鵲結行且啼問兒何事乃爾悲
父母棄之前欲追木皮食盡歲又饑夫婦行乞甘流離
負兒遠道力已疲勢難俱生灼可推與其寔尾莫我隨
不如忍割從所之今夕曠野兒安歸明朝道殣非兒誰
父兮母兮豈不慈天倫遽絕天實為十年執政雖咸腓

發廩有議常堅持昔聞而知今見之倉皇援手無所施
兒行不顧寒日西哭聲已遠猶依稀

李惟中學士自西臺侍御召入以未央宮瓦硯
為貺作此謝之

漢家作宮法紫微金鋪玉戶明華棖甄官陶瓦極能事
鉛丹細擣咸陽泥一朝神雀去不返秋風禾黍驚離離
谷陵且變此宜盡一二時出農夫犁人間購求作珍玩
洗刷篆籀分毫釐西臺執法好事者磨磨為硯尤瑰奇

體呈全璧徑尺許沼開新月才一眉堅如鐵石潤如玉
墨聲瑟瑟松風吹惠然匣送感高義但惜所與非所宜
公才真是謫仙裔善事利器方相資嗟予蕪學忝詞館
雖有此器無能為世傳銅雀亦佳品搜荆黃壤今無遺
高皇垂統四百載老瞞何物敢等夷愛人屋上烏亦好
況茲適用逾端溪楮生毛穎賀得友坐令几案增光輝
代言揮制固多愧玉堂風月猶能詩

沙湖道中

城居如坐井出郭始知春草色纔翻燒禽聲便可人遠
山來邈迤羸馬去逡巡喚醒三年夢東華足軟塵

夜至魯港

桴鼓遠銅籠前驅列炬紅星芒寒拂地江影靜浮空聽
語漁村近連航水驛通不才慚傳食鮭菜足為供

荻港早行

水國宜秋晚羈愁感歲華清霜醉楓葉淡月隱蘆花漲
落高低路川平遠近沙炊烟青不斷山崦有人家

上京十詠 并序

元統甲戌分臺上京飲馬酒而甘嘗為作詩丁丑
分省日長多暇因數土產可紀者尚多又賦九題
并舊作為上京十詠云

馬酒

味似融甘露香疑釀醴泉新醅撞重白絕品挹清玄
驥子飢無乳將軍醉卧氊
桐官聞漢史鯨吸有今年

秋羊

塞上寒風起庖人急尚供戎鹽春玉碎肥羖壓花重肉
淨燕支透膏凝琥珀濃年年神御殿頒餽每霑儂

黃羊

草美秋先腩沙平夜不藏解條文豹健嚙炙宰夫忙有
肉須供世無魂亦似麋少年非好殺假爾試穿楊

黃鼠

北產推珍味南來怯陋容瓠肥宜不武人拱若為恭發
掘憐禽獮招徠或水攻君毋急盤饌幸自不穿墉

粃麵

坡遠花全白霜輕實便黃杵頭麩退墨磴齒雪流香玉
葉翻盤薄銀絲出漏長元宵貯膏火蒸墨笑南香

南鄉
蕎麵

黑甚熟則堅實若瓦
石可代陶蓋貯膏火

蘆菔

性質宜沙地栽培屬夏畦熟登甘似芋生薦脆如梨老
病消凝滯奇功直品題故園長尺許青葉更堪塵

白菜

土羔新且嫩筐筥薦紛披可作青精飯仍攜玉版師清
風牙頰響真味士夫知南土稱秋末投簪要及時

沙菌

牛羊膏潤足物產借英華帳脚駢遮地

此物喜生車帳卓歇之地夏秋

則環繞其迹而出

釘頭怒戴沙齋厨供玉食毳索出羶車莫作

垂涎想家園有莫邪

地椒

凍雨催花紫輕風散野香刺沙尖葉細敷地亂條長楚

客收成裏奚童擷滿筐行厨供草具調鼎爾非良

韭花

西風吹野韭花發滿沙陀氣校葷蔬媚功於肉食多濃
香跨薑桂餘味及瓜茄我欲收其實歸山種澗阿

尋梅

何以慰吾衰梅花秀發時晚香傳遠樹春雪避南枝林
靜來差早溪深行獨遲與君謀一醉及此未離披

水木清華亭宴集十四韻

并序

水木清華亭侍御史王公公儼別墅也位都城巽隅出文明門餘里許園池構築甲諸邸第予客京有年識公儼亦久而未嘗迹其地至正乙未春自汴召入俄公儼由遼省拜中臺握手傾倒屢約宴集塵冗不果致期宿具復有意外之撓乃七月二十又三日始遂盍簪左轄呂仲實中執法杜德常右司王本中左司尚彥文實同尊俎酒旨樂備物腆意勤適雨霽秋清塵空地迴庭木湧翠渚蓮散

紅北瞻闔閭五雲杳靄極目西望舳艫汎汎於烟
波浩渺雲樹參差之間蕭然有江鄉之趣不知其
為轂擊肩摩之境也煩襟滯慮滌濯淨盡茲遊奇
絕宜造物之不輕畀也公儼請曰人生四美百年
幾遇不可不紀也乃即水木清華亭為韻賦詩有
壬分華字其詩曰

世祿推門閥天墀幾拜嘉高情忘勢利大隱謝紛譁朝
市塵無染蓬瀛路豈賒眷言營別墅初不遠東華畫舸

堂前過青帘柳外斜晴紅迷菡萏寒翠接蕪葭揮塵風
生座扶筇雨壓沙萍開輕泛鴨荷側重擎蛙只訝神仙
府誰知宰相家賓朋玄圃玉文采赤城霞麗曲凝雲表
鮮粧炫水涯添栽三徑竹遞賞四時花心事尊中物人
生海上槎相逢須盡興明日各趨衙

送馬明初教授南歸二十韻

并序

後至元戊寅予得請歸江夏別業明年冬遊長沙
又明年二月安仁馬君明初來見於琅璚山其人

溫醇其文粹精傾蓋如平生同遊南岳更唱迭和
遂同歸江夏甫七日復參知政事命下以小兒累
之又同北馬至任城明初舟覆幾不免間闕跋涉
不忍予棄用中臺翰林薦堂除緱山書院山長及
格擢右衛率府教授始釋褐衛官若胥卒皆國人
明初請收書教其子弟為華學官屬題之鳩俸檄
明初買書江南因得歸省其家焉過予相下將別
請言吁世俗之交翻覆雲雨況延之館塾者其為

交不又密乎饗殮之不精不時也供侍之不慎不
及也脯脩之不腆也汲引之不酬也為主人者有
能不犯於是者乎人情久則狎狎則慢慢則隙生
焉賓主至是不竭歡者鮮矣而明初與予十年如
一日始終無間言有德君子哉述其槩為詩以餞
之其詩曰

吾子昔傾盖琅璫古渡頭袖文驚蜀錦懷寶重天球心
既同金斷膠因向漆投有邀須共往無倡不為酬南岳

朝聯轡湘江莫艤舟
窮峯頂寺詩滿水邊樓
訪古由來喜尋芳到處留
遂移衡浦隱便作武昌遊
坐席何曾暖招旌遽見求
高情安旅次遐躅又神州
道路多嘗險山川只薦愁
埽雲髡兔穎鏖雪敵貂裘
善誘兒何幸深藏價未收
忽看鴻鵠舉甘效蜃蛸休
洹水寒偏瑩林慮晚更幽
誰知三仕已相累十春秋
公道先揚善真才自拔尤
恩袍明翡翠教鐸振貔貅
行役仍清淡言歸藐阻修
臨岐惟一語音信莫悠悠

送黃文復歸長沙

半生湖海夢依稀但誦湘南遠寄詩先友凋殘公獨健
故園荒盡我方歸百年未滿常憂畏千里相逢又別離
他日璚江松下路西州難似此沾衣

和謝敬德學士見寄韻

淡靄輕風弄野姿江天寥廓鳥飛遲從知宇宙多閑地
誰信襟懷勝舊時夜雨不驚逋客夢暮雲猶入故人詩
山中亦有陽春曲拂拭朱絃待子期

登岳陽樓

半空輪奐壯巴丘，消得騷人一繫舟。
雲氣遠攜湘雨至，湖光寒入蜀江流。
山川信美非吾土，天地無窮有此樓。
三十四年如夢過，可憐華髮賦重遊。

閒居雜詩四首

鬢髮蒼浪齒動搖，自知宜退待誰招。
茶餘引鶴消春晝，酒醒聞雞記早朝。
肥截玉肪羹縮項，香翻雲子飯長腰。
尚嫌門有徵詩客，時與山人破寂寥。

半山雲樹接修篁鎮日無塵到草堂
甕牖風來書葉亂
膽瓶花落硯池香
壺觴自酌教微醉
松菊猶存及未荒
護果灌園常不暇
誰知閒裏更多忙

鵲山東北接郊墟郭影嵐光畫不如
九十日春朝暮雨
兩三間屋古今書
庭花紅礙經行處
園竹青回翦伐餘
滿地蒼苔愁踏破
年來深喜故人疎

竊祿多慚號具臣
歸田何幸作閒人
登山臨水今非客
病酒愁花又過春
夢斷紫霄黃閣遠
眼明青鏡白頭新

芥臺竹筍來相續不道茅柴味更真

哲爾特穆爾為江浙平章會科舉驛請試官供帳甚盛心頗不平及還朝首議罷科舉時有壬為參知政事力爭之丞相已延議已定乃溫言慰諭翌日宣詔特令有壬為班首以折辱之治書侍御史溥化誚有壬曰參政可謂過橋折橋者矣有壬以為大恥移疾不出有壬三入中書皆以病免觀此等詩亦可以知其不得已之槩矣

和傅汝礪寄來韻二首

江水舟航日夜東故人音問得常通君才能挽千鈞重我老惟懷一畝宮自古山林容小隱只今臺省有諸公

欲知別後詩成處都在花香竹影中

春紅園圃眩西東花下縈紆一徑通
不向雷門操布鼓要從人海見珠宮
多言浪負三千牘老病都忘十八公
珍重吾宗有成訓人間何似在山中

琳宮詞次安南王韻二首

涼入簾幃夜色輕瑤臺添月更虛明
一壺天地渾無迹只有清風動竹聲

山中活計只餐霞世事茫茫日自斜
謫到玉堂無好況

夜深猶草侍中麻

和康里子山韻

洞深春早透蘭芽
窗曉雲香亂海霞
萬丈紅塵飛不到
紫簫吹綻碧桃花

李陵臺

李陵臺下駐分臺
紅藥金蓮徧地開
斜日一鞭三十里
北山飛雨逐人來

令狐學士金蓮圖

九天光彩動金閨
輦路風香樹影齊
却笑漢家恩數薄
只教天祿待青藜

都門柳

都門四十里青青
幾度迎人幾送行
老子有言來致柳
只煩相送莫相迎

夜次館陶

三老趨程不憚勞
船頭坐看月輪高
烟村漁火微茫外
一簇人家是館陶

即事二首

幾家門繫釣魚船
一陣風香燎麥烟
畫出太平村落景
酒旗多在綠楊邊

遠浦客帆明冉冉
前村牧笛響嗚嗚
園桑葉盡蠶成繭
庭樹陰濃燕引雛

送張困亮鍊師

以下別集

杏園陳迹夢暄妍
馬上相逢豈偶然
每憶可人如隔世
不聞新句又經年
花迎驛路飛紅雨
香到朝山散紫烟

王事遊方歸有日遲君洹水白鷗前

和可行展省歸過圭塘即席韻

墟里烟塵外巾車日日来疎竹呈半塔初日見三臺酒
每從鄰貰詩寧待雨催衰年懷易感為我少遲回

四月二十七日莊之淵昆季治具至圭塘醉中

賦奉寄一笑

拂水垂楊貼水荷圭塘風景正清和豈能奇字關人問
深愧羣賢載酒過花露墜紅沾杖屨松雲凝翠遏絃歌

也知節飲宜衰病其奈鄉情醉更多

秋露白酒熟卧聞槽聲喜而得句可行當同賦
也

治麴辛勤夏竟秋奇功今日遂全收日華煎露成真液
泉脈穿巖咽細流不忍潑醅甕面且教留響在牀頭
老懷磊磊行澆盡三徑黃花兩玉舟

至正改元四月十三日戊子皇帝御龍舟幸護
聖寺中書右丞臣特穆爾達實參知政事臣阿

嚕臣有壬卮行樂三奏命右丞前特授平章政
事參政進右丞臣有壬進左丞懇辭不允惶汗
就列平章右丞曰今日游騁之盛恩遇之隆不
可不紀也悚懼之餘為二十韻以獻

宇宙承平日邦畿壯麗鄉宮中無暇逸湖上覽翱翔鳳
輦重雲降龍舟萬斛驤風霆隨桂楫日月運牙樯五衛
分輦羽千官列鴈行長年花壓帽仙妓錦連航絨絳初
徐引鑾旂漸遠揚釐軒呈曼衍傑佻遞鏗鏘玉食傳麟

脯冰壺出蔗漿魚鳶知永蹕鶯燕逐餘香夾岸金戈翊
彌空繡幕張汀迴開瀚海天近勝錢塘翠閣栽雙島珠
簾護兩廂九霄披瑞靄四表覩朝陽補助資遊豫登崇
貴俊良不圖推朽質亦復被清光左轄網維地中書政
事堂出謀慚不武好學願無荒喻水民堪畏從橋策最
長濟川非所任歌詠獻巖廊

和虞伯生學士壁間韻

在公抱隱憂出塞得奇觀青山萬馬奔龍門忽中斷地

平豁四維天闊張一幔寄語鳴笳兒休驚莫鴻散

張禮部溪山真樂圖

悠悠春天雲想見平時閒獨遊溪橋上暮宿山堂間澹
然不知愁亦復忘其歡出山初無心既出還思山蒼生
待霖雨欲歸良獨難山堂悵何許蕭蕭松桂寒

寄趙秉彝

從軍苦樂不難明肯使毛錐負此生鐵騎蹴雲秋校獵
油幢敲雨夜論兵髮應瘴癘催全白詩為江山助益清

詔下凱還今有日阿縣聞已候門迎

七夕露坐感牛女事因成駁雜無實之言

別況經年慣佳期此夕逢終天為伉儷一水任西東人
世非無鵲羈窗漸有蛩廊州共明月應是憶袁翁

題趙幹江樓風雨圖

人間叢爾東南陬金陵李家無遠謀詞華欲繼後庭曲
不見東風空上樓當時百事尚纖麗況在畫工專末技
洪河喬岳昧平生曲闌幽檻窮清致石頭城下無重關

甲馬營中有佳氣九天飛墜曹將軍盡卷版圖克上計
小兒造化吁可憐乾坤又到宣和年君王搖毫自塗抹
片紙落世人爭傳坐看南北又分裂遂使兩家同一天
偶從斷縑閱小景慨念興亡豈天定而今蕩蕩混一圖
但少儂歸理釣艇

次賈伯堅左司寄來韻二首

酒來宛國注紅香魚出涼亭薦雪肪多病浪仙都闕此
空哦清句嚼冰霜

賜霑魚鳳玉脂香大笑輕身服鴈肪華髮侍臣歸有日
駕鸞先報一天霜

代書寄可行第二首

漢川雲夢有租田今歲應逢大有年約束諸僮公出納
羨餘留糶杖頭錢

文竹移栽只五根來時無數長兒孫不因繁冗休輕翦
要使清陰過酒尊

出郭

萬慮攻催雪滿頭還鄉纔得縱遨遊
太行雲盡青浮曉
洹水霜餘碧染秋
漸老始知閑有味
此回真與世無求
溪山好處鴟夷滿
況有風流老郡侯

黃華山中雜詩二首

道人解后一開顏
為借筇枝策我孱
鳥語留人還小住
晚風吹破水中山

挂鏡臺西挂玉龍
半山飛雪舞天風
寒雲直上三千尺
人道高歡避暑宮

墨竈寺追和緱山先生韻

丹霞圓鎖翠潭潭仰面青天鏡出函解組已能辭好爵
判山還欲署新銜冷傳霜信風生谷清透雲根月滿巖
却憶瓊江舊林壑幾多烟霧護松杉

九日登鳳寧山

亭亭鳳寧山形勢若飛動胡為不飛去仙真此搏控靈
跡既不悶烟霞遂增重城居見其圖清賞時入夢本朝
事幽尋霜風肅飛鞚適與佳節會更與佳人共危亭構

兩翼飛雲連畫棟
翠柏瀉秋聲
紅樹列清供
遐觀千里近
長歌百杯送
洄流嗽其根
俯瞰清可弄
陟降自忘疲
酬酢益豪縱
牛山何用悲
茲方待鳴鳳

次和可行圭塘雜詠

錄三

以下圭塘欵乃集

與客泛舟

欵乃聲中動畫橈
不煩舟子更相招
而今赤壁荒寒裏
試問何人有洞簫

日夕觀山

林慮千仞翠巖巖罨畫工夫在莫嵐徙倚崇臺觀未足
紅輪西北月東南

雨中移竹

山人聚景作池臺移得龍孫帶雨栽頃刻雲間晴日上
便教陰過酒尊來

圭塘獨坐

我屋來西圃輪蹄二里遙晚風收菡萏秋雨長芭蕉有
酒容開口無官免折腰柴門莫堅閉恐負野人招

新秋即事

莫蹋蒼苔破茨門
晝亦闌林風秋入樹
波日晚搖山原
野蒼茫外烟霏指顧間
更須安一榻月夜不須還

次和可行鄉友具宴謾成

相望不隔一牛鳴
尊俎過從見至情
荷露清涵芳酒氣
松雲寒遏豔歌聲
高車駟馬初無意
白酒黃雞舊有盟
醉脫烏紗從露頂
絕勝前日縛塵纓

次和可行赴圭塘

卜築何如履道坊千紅萬綠浸銀塘要回衰境為全盛
却使閒人號最忙活水清園容膝屋新篁高出及肩牆
烟霞遮斷塵埃路才覺山林白晝長

許有孚

有孚字可行有壬之弟也登進士第歷官南行臺
御史同僉太常禮儀院事鄱陽周伯琦圭塘欵乃
序曰中丞安陽公謝事歸相州于其第之西二里
得康氏廢園雜灌莽剗菑翳鑿池其中袤廣以步

計者千餘深八尺形如桓圭雙洲右枕孤島左峙
夷隄繚垣崇臺在肘芙蕖楊柳棗栗桑榆梅榴桃
杏蒼松翠竹之屬周于池之中外蓋培植踰年而
後成惟二古檜巋然乃康氏故物公時杖屨攜弟
若子會賓友觴咏其間以池之占勝居多故以圭
塘名此倡彼和宮商遞宣少長同歡主賓相忘遂
名其篇曰欸乃若漁歌互答然公季弟都司君自
為之引裒成巨帙凡得詩古律五七言總若干首

亦以見安陽一門文物之盛云

欽乃擢船相應聲也元次山有湖南

欽乃曲舊誤作款乃并誤音襖靄今改正

圭塘雜詠

并序

錄三

圭塘亭臺浚築之役經始及落成有孚實皆與聞
吾兄時一來遊雖乘興忘返而芳春長夏秋晴冬
燠有孚獨得賞玩竟日不敢孤兄之賜謹取日所
為事各成小詩題曰圭塘雜詠用發長者一笑塘
之可咏者不止此又當別撰拜呈

柳下聽鶯

陰陰烟翠足潛身其奈嬌喉百轉新却憶當年閨闔曉

思袍光照上林春

登第日唱名西宮密
通上林嘗聞鶯也

日夕觀山

晚晴臺上看巉巖萬壑千峰起翠嵐恰似雲間招五老
今宵有夢定江南

遠隄種菊

酒熟同招隱士看飢來忍把落英餐春風無限閑桃李

不似黃花耐歲寒

雙洲

吾聞東海之上有十洲羣仙出入洲上頭瑤花琪樹聚
麟鳳不與塵世同春秋吾池不啻涪蹄水孰謂蓬瀛敢
相擬獨憐亦復惝雙洲雲霞業岌烟波裏飛橋子午凌
空虛朱闌綠柳陰扶疎亭臺倒影山色好四顧彌望皆
芙蓉清風為賓月為友但恨不將池變酒恍如乘槎泛
天河又疑身在無何有從知雲海空復空仙凡一笑將

無同浪遊不必訪弱水人間亦有蓬萊宮吾儕小人可
惜無仙骨由來二洲不是池中物

以下三詩見圭塘小稿以其專詠圭塘之

勝故類附於
雜詠之後

柳巷

種柳圭塘路行行便向榮雨晴羞眼澁烟煖細眉橫色
比金猶嫩枝看翠易盈林疎無繫馬葉接有啼鶯線亂
柔條裊毵鋪落絮平尋詩常獨往送客或同行歸院塵
難到還家月每明上通陶令宅不接亞夫營京兆時非

昔平康夢自驚陽闌休疊曲司馬易傷情但恐春回馭
何將酒解醒託根因勝境由徑得嘉名莫訝公休吏詩
成句未精

疏圃

有池可汲園可斲拂袖歸來心願足自甘學圃為小人
愛此菜茹畫苜蓿元脩雨後脆且腴諸葛數榮闕濃綠
蘿蔔生兒芥有孫芋魁出水頻澆沃罷鋤時或釣池魚
隱几何曾夢蕉鹿既無抱甕老翁勞亦免趨炎骨肩辱

吾嘗寓甲第紛紛厭粱肉吾今日烹葵食鬱雜墊款彼
紫駝峰出翠釜爭如菰韭侑炊粟五侯之鯖世所貴五
辛之盤吾亦欲庸人皆被富貴熏或羨吾餐是清福但
令此色毋駐顏雋味留根充我腹三年不窺慚仲舒吾
儕何可輕樊須九月築場十月滌連年藉此輸官租

侍飲圭塘和楨韻

并序

錄一

至正己丑歲相城春夏不雨旱既盛六月廿九日
始雨入夜沾足吾兄乘梭輿挈壻姪來圭塘縱觀

樂甚猶子楨具饌且有詩兄謂有孚曰詩雖不高
其意可取遂走筆荅之有孚亦技癢弗禁依韻得
四首兄載賡之楨亦自和共八章觴咏間作於荷
聲樹色中不謂此身之在塵世也時東平孟彥超
來尹安陽方走神祠致懇禱甘澍適應尤可喜也
故并及之

買得園亭位面陽百年心事一時償
風吹楊柳回鸞舞
雨浥芙蓉墮馬妝
相下未成真率會
洛中空記姓名香

當時太液池邊宴不信人間六月涼

辛巳之夏吾兄以左轄被命留京師

遵故事率留守臣登廣寒殿視鐫漏適御酒至恭宴池上有長句故及之

次和可翁新秋即事

池亭殘暑去樂事日相關徑列霜前菊
窻招雨後山好詩來枕上爽氣滿人間
極目崇臺晚遙天一鶴還

睡起偶成

清風枕簟水雲鄉夢覺槐根百慮忘
起課山僮笑多事飼魚跟藕摘蓮房

嘉蓮亭宴罷奉陪泛舟夜分始歸賦詩三十韻

是日之宴渤海縣尹吳安之以使來具也

閏七月二

十一
日

池亭秩芳筵落日船始放晴空散餘霞秋水淨氛塊高
荷雖離披尚爾綠彌望寥豁成壁池不礙雙槳盪縈紆
湛澄碧天宇益虛曠石竇來驚湍松隄俯新漲鼎立洲
嶼連沿洄時一傍飮餽羅珍羞傾倒出奇釀侑以二名
姬朱絃倚清唱凝雲響空翠幽禽或翺翮所愧杯行遲

負此百川量須臾羣動息露氣白沆碭灑然毛骨輕不
獨情緒暢鐙火空濛中仿佛江湖上陋彼西園游飛蓋
何冗長云胡漾陂行亦復怯風浪而我方扣舷馮虛恣
搖蕩吾兄嚴鄭流高節張邴亢少飲如醉翁浮此齋畫
舫頗恨交游稀每每折輩行遂令子弟間日侍屨與杖
樓船憶當年樂事炊一餉望洋失所操伏櫪今在鞅靜
言校疇昔所得多所喪與從天上人何似山中相但恐
時易失俛仰異欣悵銀漢淺且清神槎喜無恙人生貴

適意前修語非妄榜人報更開列宿光蕩漾故舊東海
頭何當剡溪訪

十二月廿又二日觀雪冷然臺城郭山川四顧
清爽小兒誦東坡先生聚星堂詩甚習殊可樂
也因憶馬明初云往歲德常杜左司嘗與諸公
和之成巨軸然皆不及一見僕則不敢言和但
對景乘興謹用其韻爾僭越之罪觀者恕之

花飛六出亂無葉冷然臺上偏宜雪茫茫大地迴無塵

渺渺予懷正奇絕山容喜從天際改竹聲時聽池邊折
相知更有灞陵翁長途不信人蹤滅平原饑鬼巧踰藏
空闊蒼鷹飽飛掣小兒忍冷從吾觀楚楚毳裘蒙采纈
坡詩誦得聚星堂字字珠璣飛玉屑懷賢撫景慷慨生
歲月堪憐去如瞥豐年但願太史書故事須從汝南說
歸來舉似宋廣平却笑梅花心似鐵

時梅皆
凍損

許楨詩附

楨字元幹有壬之子以門功補太祝應奉翰林金

臺王翰稱許氏昆季之賢羣從之才俊有非他人之所能及者并見于圭塘歟乃集中

次和圭塘雜咏錄二

日夕觀山

亭西咫尺聳千巖清氣侵凌湧碧嵐紅日欲沈山更好從他捷徑在終南

月下觀梅

老樹清溪映白沙可人竹外一枝斜黃昏信步前邨去

香到松林賣酒家

瑞蓮歌次可行叔韻

太行山下溪名洹洹溪主人今得賢石渠分溜入方沼
種出萬柄紅白蓮就中一茄發挺特豔妝雙出雲髻鬢
有如二女降為汭翠裙紅袖相牽連岐分駭目未信宿
里闕傳耳何喧闐波神有為獻嘉瑞要竝太史書豐年
主人謙德不敢有福善自是天行權亭亭植立萬花表
可人適在亭之前日酣欲語轉嬌婉風動似舞尤輕便

一時圖寫溢紈素十日車馬空市廛昔聞蓂莢曾表異
乃因土階與采椽景星鳳鳥豈常有考信前史真宜傳
醴湖蕪塞不復見而今乃濯圭塘泉禎祥奕葉定不斷
藕絲萬縷相纏綿幽人到此自怡悅膏肓泉石尤難痊
要須紀錄入郡乘千年增重吾山川

睡起偶成次韻二首

乞得西園作醉鄉浮生俗務總相忘水雲清徹荷香裡
小艇虛明似洞房

賦詩舒獻杖藜行水色山光不世情醉卧午窗誰喚醒
柳陰啼鳥兩三聲

馬熙詩附

熙字明初衡州安仁人也歷官至右衛率府教授
嘗作摸魚子樂府十闕并圭塘補和詩附記于後
其原序云欵乃既歌之明年熙如京師可行泊楨
日侍安陽公觴咏圭塘更唱迭和詩辭凡二百四
十有九又明年楨來京師熙始得伏讀全集大篇

雲行短章泉流無非樂日用之常而憂國憂民之
實亦未嘗不默寓其間也楨聞詩趨庭日有新益
而熙乃以抗塵走俗不得與于斯文媿可勝言耶
然可行序引有張本同聲之說固欲援之入社今
雖未至未必峻拒之也于是忘其蕪陋勉強補和
得詩七十八詞八錄次左方惟二先生進而教之

和可行圭塘雜咏錄二

攜妓落成

省事山翁許鶴隨
燕鶯奔命為誰疲
情知歟乃多幽事
不付樵青付雪兒

開窗看雨

洞房編葯屋編荷
八面玲瓏得月多
誰遣天飄簫雲過
嫩涼扶我入無何

和可行即事

載書逾十乘
儲醬乏千缸
竹影明窺戶
荷香暗度窻
對山方目擊
見客又心降
落日層臺表
蒼烟白鳥雙

和可行鄉友具宴

石溜穿渠瀟瀟鳴眼中幽事總闕情故人載酒不盡醉
好鳥隔花空有聲但使軒扉常款客不妨松菊屢尋盟
西風瘦馬長安路說與山靈笑絕纓

蒲道源閒居叢藁

道源字得之別號順齋世居眉州之青神徙家興
元道源強記過人究心濂洛諸儒之學嘗為郡學
正罷歸絕口不言仕進晚以遺逸徵入翰林改國
子博士歲餘引去起提舉陝西儒學不就優游林
泉病弗肯御醫藥飲酒賦詩而逝以仲子機貴贈
祕書少監哀輯其遺文曰閒居叢藁二十六卷黃
文獻公潛為之序曰國家統一宇內士俗醇美一

時鴻生碩儒所為文皆雄深渾厚而無靡麗之習
承平滋久風流未墜皇慶延祐間公以性理之學
施於臺閣之文譬如良金美玉不俟鍛鍊琬琢而
光輝自不可掩蓋當時之風尚如此可以徵世運
焉

閒居紀事二首

客從長安回敘闊訪鄰里貌悴於去時因而問所以客
悲向我言此行幸脫死長安遭飢荒食盡到糠粃升合

貴不貲珠金何足恃凌晨出求糴于于如櫛比莫歸持
空囊菜色皆相似老弱困且羸行隨牆壁倚邨墟向昏
黑剽掠羣兇起咸云田中麥苗枯無雨水今年如弗收
炊爨當易子子聞重歎嗟禍及乃至此八政食為先周
書本微旨天下苟有飢糴思若由已梁惠戰國時民粟
知移徙一夫不獲所古人心愧耻如何填溝壑遽忍立
而視此邦粗偷生脣亡寒及齒嗷嗷食口衆身不親耒
耜今朝聽此言徒增驚悸耳

古人制昏禮所貴在人倫冠笄年既邁受幣方交親後世雖偷薄十中五猶遵如何至今日彝典俱湮淪男癡已合配女幼皆成姻安知慮天壽奚暇占吉辰媒妁走市井鼓吹喧城闉百年祇倉卒大事為因循問之何遽然詔云選佳人傳聞至太甚意失非本真正道難化俗謠言易惑民於初苟不慎其末弊將臻寄聲秉鈞者風俗何時淳

送府史竇彥立遷調奉元

謁謁府中英夫誰可屈指竇君長安人衆論共推美氣
和更敏才志銳方壯齒留胸無芥蒂出語有綱紀一朝
過我辭試問其所以廟堂新立法為吏互遷徙簡書迫
程期信宿不容止門當道途旁所幸還鄉里聞之心惘
然別緒紛莫理一杯送歸驪一言贈吾子人生重名節
不義深可耻青雲路雖高欲致由踐履去去宜勉旃好
音行洗耳

次德衡弟韻

古道不可作轉覺澆風長人心所去就但與時炎涼燕
石藏什襲連城遺路旁汝賢乃迂闊汝直成狂狷世味
鼎一臠人爭染指嘗伊我淡無慮簞瓢身世忘處污奚
害潔視變皆為常彼哉聲利徒末路空皇皇

春晚山茶始開示德衡弟

山茶本冬花憔悴遂開晚儕輩鬬芬芳已獨尚息偃及
茲春事深渥丹始赫烜參列姚魏前正色無婉婉因之
觀我生平昔匪驕蹇衡門自棲遲臨老遇推挽朱紫皆

少年跡親心自遠華顛豈懷榮田里幸得返功名船上
灘歲月輪下坂撫樹三歎息歲寒同繾綣

仲春十三日大風雪

兩日東風何作惡橫將桃李花吹落陽和歛忽變寒威
曉來陡覺春衫薄紛紛撲面飛蟲亂細看六花驚雪作
須臾眼界失舊觀玉殿瓊林起沙漠細思節物恐差謬
始信化工難測度初遷喬木悔新鶯久屈重泉愁尺蠖
仰天致詰不我酬運候果誰司橐籥便當努力戰客陰

一掃晴空開六幕

贈龍巖上人草書

韓云浮屠多技能祇今復見龍巖僧
高閑懷素去已久肯向死灰求續燈
手追心慕忽有得筆底渙然無滯凝
雲烟結暝鬼神泣雷電索怪蛟龍騰
懸崖百尋瀉瀑布老樹千歲垂寒藤
鐵為門限自茲始但恐紙價相仍增
我聞雪菴亦工此好事往往輸鱣繒
都城顏扁妙天下驟得榮寵非階升
龍巖更須追三昧無俾斯人專美稱

送吳閒閒真人

天風吹衣雨浥塵
盧溝曉別詩境新
石梁雄據天下津
羣峯迤邐西北垠
草木點綴生精神
驕馬駐足車停輪
紛紛追逐皆朝紳
相與祖餞為何人
閒閒嗣師方外臣
貌雖老氏心儒珍
恩許還家壽乃親
翁媪年皆八十春
饒國啓封降絲綸
上尊分賜光祿醇
道傍見者咨嗟頻
此行豈為思鱸膺
舳舨遠瞻戀嚴宸
青雲我亦忝致身
先世贈典蒙深仁
但恨不及生存辰
因君此圖淚沾巾

贈傳神李肖巖

人生天地洪鑪中形色散殊俱不同畫師筆底要真似
妙想乃與天機通肖巖後出獨超詣睥睨衆史如兒童
京師摹寫富箱篋奇厖福艾多王公神情所賦各臻極
千變萬化無終窮遂為當代顧陸手足配向來襄鄂雄
明憲副本得寓目起敬毛髮森寒風祇今聲價愈增重
姓字已徹明光宮塵容俗狀亦何者年齒未及先成翁
既無開朗謫仙韻又無圖畫凌烟功君胡惠然肯相過

坐對熟視心神融
煤黥紙上畧點畫
稍類雲月猶朦朧
須臾壁間出幻影
恍若面映新磨銅
人能肖吾不自肖
內發感愧顏生紅
聖賢體貌等人爾
所貴踐履惟能充
作詩荅謝肖巖貺
但恨意遠辭難工

題錢舜舉畫烟江疊嶂圖

江山奇絕吳楚鄉
畫史又與生錢郎
錢郎下筆得天趣
意象髣髴開衡湘
浮空水光接巨浸
隔岸嵐翠摩穹蒼
幽巖梵宮半隱見
老樹樵舍相迷藏
中流一葉泛小艇

遠澗千尺橫修梁山居熙熙自太古下視擾擾徒奔忙
我來京國行九軌塵土眯目鬚眉黃困餘偶作林壑夢
歸計未遂驚彷徨明窓豁然看此畫便覺胸次生清涼
何時挈舟徑成往長嘯振衣千仞岡

新麴米酒歌

梅隱先生命
作就為壽

驕陽行空勢方烈刈麥農夫寧憚熱天旋雷動飛玉塵
霧勃雲蒸成麴蘖麥秋方罷還插秧穰稷西風千頃黃
腰鎌肩擔行相逐共趁晴色催登場碓舂糠粃光如雪

汲泉浙米令清潔炊糜糝麴同揉和元氣細縕未分裂
甕中小沸微有聲魚沫吐盡秋江清脫巾且漉仍且飲
陶然自覺春風生君不見淵明有田惟種秫醉裏作詩
聊自述又不見幽風十月穫稻忙春酒介壽俱徜徉但
願年年遇豐稔更須三萬六千場

將至中山

中山何處是隱隱望孤城遠靄青林暗斜陽白堦明韓
蘇名不朽遼宋恨應平策馬長途晚風沙老客情

偶書

入樹秋風早驚心節序遷晚雲兼去鶴涼雨靜鳴蟬得
句因新意耽書是宿緣平生愛冲澹何事亦華顛

九月十八日黃菊始開時且禁釀謾成示德衡
弟

苒苒秋事杪幽叢花始黃直須彫衆卉纔許見孤芳重
露洗金質嚴風吹綠裳陶翁如有酒何日不重陽

偶記少時小年能綴文詩

彼美誰歟子蘄然早見稱綴文當世有惟汝小年能雅
齒為星鳳清姿秀玉冰聯章成脈絡緝句合規繩穎悟
過長吉推揚自少陵可憐東魯客頭白短檠燈

覺和尚菴賞白蓮

冰雪肌膚出淤泥伶俜寒影照漣漪曉風浮冷夢初醒
夜月嬋娟清更宜未要露濃垂別淚先看水滑洗凝脂
陶詩近體驚兒女大笑廬山遠法師

郭某席間賦

喔喔晨雞喚夢醒
窻銜好月壁銜燈
宦情嚼蠟淡無味
世路登天吁可憎
十載飄零都是客
一廬寂寞靜於僧
調羹事業無勞說
深謝諸公愧不能

餞楊同知任滿西歸

道傍笳鼓記迎新
又作長亭惜別人
千里畏途成雅俗
一言寒谷變陽春
朝廷有意歸楊震
父老無從借寇恂
金印此行如斗大
西還遙望使車塵

九月八日賦二種芙蓉二首

紅芙蓉

豐肌弱骨與秋宜宿酒酣來不自持豈為嚴霜成槁質
要憑初日發妍姿燕姬入畫猶嫌陋蜀錦團窠未足奇
獨對芳叢寄幽興子高真是遇仙時

轉觀芙蓉

露涼風冷見溫柔誰挽春還九月秋午醉未醒全帶豔
晨妝初罷尚含羞未甘白紵居寒素也著緋衣入品流
若信牡丹南面貴此花應是合封侯

次耶律奉使鎮南樓詩韻

雄視坤維有此樓
恍疑八表繼神遊
山連秦蜀相隣際
水接襄樊不盡頭
陰闔陽開增偉觀
月明風冷怯清秋
百年豪傑登臨處
詩興飄飄隘九州

九月同李子文羅壽甫行城南溪上

溪水泠泠玉佩聲
沿溪路轉忽川平
襟懷鬱滯得開豁
腰足痺頑時散行
幾樹霜紅明夕照
數峯烟碧倚寒晴
茲遊勝友相酬和
殆與秋光欲鬪清

次韻王仲禮

上巳約出郊
雨不果往

朋友惟君氣味投相尋一笑果何由
暇中值雨惟思睡
貧裡逢春只辦愁行樂忍令佳節負
光陰不為少年留
且看明日開晴霽拄杖從公到處游

初至京城寓居言懷

道途奔走四千餘憔悴京城僦屋居
曉逐時英登館閣
夜因羈夢到鄉閭將衰敢望功名顯
臨用應慚學術疎
落日孤雲天一角眼穿誰為附來書

題達實特穆爾大夫所藏王維畫寒林曉行圖
野景荒寒霜意邊疎林僵立勢參天定應畫妙王摩詰
故著詩清益浩然驢怯小橋鞭不動風掀危帽整還偏
官閑老我叨君賜紅日三竿尚晝眠

和霍思齊接駕

六軍嚴衛抱珠旃曉發衝開宿霧寒象輦塵清千里至
龍顏喜動萬人看踐禾屨戒畋秋騎獻果爭迎住夏官
自愧涓埃無以報敢辭奔走候儀鑾

辭陝西儒學提舉閑居言志

布穀聲中雨散絲
曉窻濃睡正忺時
春來暖透黃紬被
老去甜歸白粲糜
仕及引年何況病
官雖閑局亦當辭
為予多謝門前客
莫怪慵夫應接遲

金釵翦燭

幼作

歌舞蘭堂夜色深
燭花輕翦試釵金
分開小鳳雙飛翼
撥盡寒灰一寸心
玉淚亂隨紅裊落
蠟香留得碧雲簪
短檠二尺挑寒雨
頭白書生正苦吟

漫題

花下提壺勸酒桑間布穀催耕甚欲晴天行樂却因春
雨闌情

和趙君錫題王仲禮壁韻

迅速光陰一旅亭功名不貸鬢毛青此身未入雲臺畫
半夜披衣望列星

題王羲之鳳墅續帖

一作題
蕭寺

吳山佳處梵王宮樓閣崢嶸出斷峰不見子雲當日字

暝烟殘照但聞鐘

次德衡弟九日以萸酒來貺

萸如蠅子攢頭赤酒似鶯兒破殼黃
饋我真成兩奇絕
為君大醉作重陽

次仇教授西鄉道中言懷二首

荆榛莽莽暗前邨
閒有花枝弄好春
誰料山禽解生事
一聲腸斷未歸人

花枝不管人為客
笑向春風滿意開
忽憶尋芳年少事

夢魂曾繞故鄉來

題洋州土神祠海棠

一點芳心肯破慳
恨無紅錦護朝寒
花如解語應須道
多謝詩人著眼看

題蒼玉亭卷

冷光翠色入疎櫺
歲晚相看眼共青
靜聽蕭蕭有餘韻
似能和我讀黃庭

題墨梅圖

春風不解惜瓊英，可是招魂有客卿。
記得小橋曾度處，數枝和月浸溪明。

題瘦馬圖

誰寫驊騮草野閒，身行萬里骨如山。
絕勝秣飼無他技，枉占君王十二閑。

題江皋雪霽卷

山川玉潔映朝暉，人世鴻濛果是非。
只許詩家占清景，漁蓑偷載一船歸。

題白汝明秋江晚渡卷

白號橫舟

岡巒迤邐水悠悠鴈落沙洲古木秋
隔岸有人愁日暮
急須濟我勿橫舟

己巳上元

太平節物自欣欣燈火鼇山鬧徹晨
今夜月華依舊好
可憐只解照愁人

賦柳

枯樹生萋色已嬌低垂江岸映溪橋
東君不惜黃金縷

散作春風十萬條

賦石竹

短籬新見出稍稍
蔥蒨都無尺許高
茜色芳葩工點綴
莫教容易混蓬蒿

安熙默菴集

熙字敬仲真定藁城人先世以貲雄離石藏書萬餘卷金亡徙家熙少承祖父之學聞容城劉靜修名將往從之游未行而劉卒走往拜其墓錄其遺書而還憲司數以其行薦於朝無所就至大四年卒年四十二學者稱默菴先生門人蘇天爵輯其遺文為默菴集謂其文章以理為主皆有為而作詩學淵明晦翁第以吟咏性情陶寫造化而已自

金源氏與宋分疆以詞章辨博相雄長元初姚公
茂得趙江漢之書而北許魯齋力起而昌明之而
理學始傳靜修能以所學羽翼魯齋而推源於周
程邵朱者也敬仲私淑靜修而尊朱子之說以為
教遊其門者望而知為安氏弟子北方之學於是
乎益振敬仲固劉氏之功臣然其詩去靜修遠矣
擬古次韻六首

鬱鬱宮下柏青青水中蒲
宮前有幽人壯歲嘗獨居
獨

居亦何為不羨春華數十年掩關卧門庭盡荒蕪美人
殊不來日夕聽軒車

零零白露下品谷悴芳蘭蘭悴不復辭誰與念時艱堅
冰行復至雪深路漫漫愁絕將奈何撫几一長嘆

中州有寒士塊然守空堂清貧久有信壯懷殊未央豈
不願馳騁冒雪凌風霜振策萬里途超忽追鵬翔永念
同懷人渺在天一方悵望不可見慷慨發清商獨處誰
晤語百感摧中腸人生諒難必且莫徒悲傷

採柏空崑下倚竹荒庭前人生非金石君心詎能堅君
心或有渝賤妾終不疏天地一瞬息今古一長途借問
離別苦君心竟焉如不見園中樹日日爭華敷秋風一
夕至已逐嚴霜枯歲晚闕得去山空難久居

崑崙一何高出此無窮河遙遙何所往不啻萬里多一
意在朝東日夕無停波遠遊計不蚤壯志成蹉跎夫君
不我顧鬱鬱將如何覽物悟物變端居閱年華興來展
遐眺緩步空山阿四顧渺塵世杉柏紛森羅吾樂誠何

極憂子獨長嗟春馬誰晤語一笑空烟蘿

人生有定分所貴能樂天自輕失所守欲進安敢前思
君重思君此情誰與宣舉頭見明月顧影徒自憐終當
謝塵世洗心聞澗泉

酬王治書仲安

少年不解事妄意欲聞道力小任匪輕今茲半摧倒生
平寡師友恨不識君早所期親杖屨函丈供灑埽盡出
胸中疑為我細分割奇章忽見示踧踖警中抱過許君

豈然無乃習稱好摳衣或有幸同遊萬物表他年重盍
簪會觀太玄草

病卧窮廬時詠靜修仙翁和陶詩以自適輒效
其體和詠貧士七篇非敢追述前賢聊以遣興

云爾
錄二

士生三季後俵俵渺何依空餘身後名炯炯留清暉自
古有商顏冥鴻快高飛白雲在空谷哀歌嘆安歸雖無
首陽薇紫芝足療飢九原不可作撫已良可悲

靜中有真趣非絃亦非琴耿耿方寸間千年有遺音手
植庭下蘭奇香愜幽尋獨處誰晤語有酒還自斟西山
薺薇多長往夙所欽塵迹尚淹留低回愧初心

封龍十詠 錄四

熊耳峯

高五百丈摩雲揮漢峭
出羣峯山之極高峯也

窮探不憚遠行登最高峯頓覺天宇近一洗羣山空奇
哉此絕境造化天無功神襟一以曠寫我浩蕩胸遠意
殊未極更思脫樊籠何當著神鞭駕此慵飛龍翩翩上

箕尾再見開鴻濛長嘯莫雲合輕衣振天風

白雲洞

在獅子峯後華蓋峯西天欲雨則雲從洞出霽則如歸焉

峩峩兩峯間崔嵬聳雙闕中有仙人洞恍若仇池穴朝
開白雲生暮掩白雲滅朝昏有奇變宛與人世隔我來
搴綠蘿深尋得幽絕平生棲遁志茲焉益超越未成長
往計復愧固窮節永懷靜修銘淒其仰前哲會當結茅
屋來此寄疎拙沈思畢舊聞長歌抱明月白雲應更深
老眼益清徹未敢獻吾君聊爾自怡悅

修真道館

在獅峯下中央平坦泉石甚盛宋政和中賜敕額迄今殿宇猶為山

中之冠

龍山古靈境連峯鬱蒼蒼林谷四環合修真據其陽怪
石通流泉洞府餘清涼傑閣聳奇觀烟霏恣微茫眷予
平生心丘壑真膏肓今朝定何朝遂愜棲雲房晴嵐染
衣襟頓覺塵慮忘矧爾羸疾拘快若脫繫韉月高風露
清空明渺銀潢蓬萊信非遠何處求仙鄉

吟臺

在中谿書院宋初李文正公昉於此受業

步上吟臺荒極目但平楚四顧渺無人持杯欲誰語心
期反招隱自笑非梁父抱膝一長歌商聲振林莽

次韻書事

野性元孤潔無朋儘自蟠業荒聞道淺靜久閱人多靈
鳳寧栖枳冥鴻本避羅南遊有高興何處是滄波

病中齋居雜詩次和仲韻五首

錄二

時事今如此幽居獨慨然心期鐘鼎外身世水雲邊病
骨便清晝高懷惜壯年前修渺何在目斷夕陽天

多病交遊少相看動浹辰賦詩聊遣興觀化足怡神問
字有知己過門無俗人伊誰同此樂願許卜東鄰

冬日有懷憶故人

病鶴孤鳴在九臯虛名多累恐難逃殘陽入谷隱猶見
新月穿雲出未高江上蓴鱸君自適山中泉石我徒勞
興來欲駕扁舟去何處滄波有巨黿

仲冬初吉歸途即事

霧慘雲愁結暮陰遊方客子正悲吟霜風有恨號平楚

寒日無光下遠岑
滄海齊州半搖落
乾坤今昔幾消沈
意長世短誰知會
一曲商歌萬古心

錢雪溪宮人圖

露冷月華白
悠悠方寸心
夫君渺何許
悵望碧雲深

中秋不見月

蕭颯西風起暮愁
無端陰翳掩晴秋
何當放出中天月
重照山河十二州

故縣道中

塵事年來亦屢更此身與世澹無情
敝裘羸馬嘉陽道只有雲山管送迎

杏花始開連日大風不獲一賞晨起攜筇往觀
之歸而小酌得三絕句

錄二

生紅和露滴胭脂又到芳春寂寞時
便擬提壺花下醉却愁羞殺背陰枝

杖藜吟繞去還來收拾春光入酒杯
自是風花要題品等閑蜂蝶莫相猜

陳櫟定宇集

櫟字壽翁徽之休寧人七歲通舉子業宋亡科舉
廢慨然發憤以為有功聖門莫若朱氏之學乃著
四書發明書傳纂疏禮記集義等書數千萬言延
祐開科櫟雅不欲就試有司強之中選竟不復赴
禮部教授于家不出門戶者數十年臨川吳澄亟
稱之凡江東之士就學於澄者悉遣而歸櫟學者
稱為定宇先生卒年八十三有詩一卷其句法如

笑渠挂笏看山色容我扶筇聽水聲
柳枝水灑一溪月豆子雨開千嶂烟
先苦半生真食蓼回甘晚景異嘗茶亦殊不多見也

送汪希道入都

希道嘗為廉訪司照磨鞫洞蠻獄以失出阻仕進者十年

行行觸秋暑勇往觀國光修途或濡滯一瞬北風涼
不仕餘十年養親竈罕煬將謁吏部選寸祿願少償庶畧
助甘旨贖其不遑將不仕果何因憲幕嘗翱翔驅馳海
南北訊獄主慈祥詿誤陷賊黨詰問加精詳活千七百

人解縱還善良幾以失出譴究竟靡濫臧久之天日開
歲月坐荒荒濔溪范參父議獄俱慨慷殺人求媚人毋
乃欺穹蒼活千人有封君後必當昌安得當吾世而不
蒙薦揚當路願鑒之萱草癯北堂俾得早言歸為養及
壽康臨期重丁寧白雲遙在望

寄鄭耕巖

古來隱士多躬耕身將隱矣焉用名巢由以降名著稱
皆違本志非真情真隱克隱分偽誠終南捷徑招譏評

隱而無名妙不勝詩之衆噴將驚霆君家子真當河平
五侯霧塞黃冥冥此何如時可軒騰宜哉掉頭呼不應
遂使谷口聞西京名挂法言聲鏗鉤君其裔邪良錚錚
幾載龍舒以道鳴巖居高尚追芳馨時哉不同逢文明
胡忍被褐韜連城鄭公鄉想多豪英仲容方奮青雲程
曷不彈冠濯塵纓天風再秋鶚孤橫春浪紅暖翻飛輕
幡然堯舜君與毗他年身退當功成法疏廣受辭恩榮
明農巖下相攜行世有工畫傳丹青與令手卷雙合併

次光姪詩韻

誤子窮途計已疎
擇棲所恨匪岡梧
酉申乞舍傳書鴈
庚癸呼馳汗血駒
儒術謀身慚杜甫
老農請學合樊須
細思金亦何勞躍
陶鑄從諸天地鑪

再用易巾韻

隨處聊憑製漆紗
豈其官樣必京華
竹皮最古今苴履
椰子稱奇亦貯茶
椰子可為冠亦可為茶瓶見山谷詩
禿髮已知頭似筆
笑顏底用面如靴
小冠子夏時方尚
岌業青雲難自誇

子靜和易巾韻五用韻荅之

月移梅影上窗紗
恰讀新篇對月華
和似鶯黃盈盞酒
清於兔褐半甌茶
金身丈六蓮生座
汗脚尺三霜滿靴
選佛選官俱是幻
詩名不朽後人誇

圍獵

昆蟲已是蟄藏時
獵騎紛紜繞翠微
勿謂火攻為下策
畧同兵戰寓危機
仁心誰去網三面
殺氣似環城四圍
乾豆元來因報本
克庖豈但愛鮮肥

晚蟬

秋早梧桐晚風鳴蟬無數樹陰中斜陽似假渠聲勢
只是斜陽不久紅

秋後蠅

夏日營營遶案飛轉多秋後亦何為從教引類集瓜上
落蒂秋瓜能幾時

胡炳文雲峰集

炳文字仲虎徽之婺源人父孝善先生斗元從朱
晦菴從孫小翁得書易之傳炳文尤潛心朱子之
學作四書通易本義通釋諸書吳文正公嘗薦諸
朝不就辟信州道一書院山長再調蘭溪學正未
赴至大間其族子浚為建明經書院以處四方來
學者儒風之盛甲于東南面山而居碧峯聳秀嘗
作詩云舉頭山蒼然一峰立雲表因自號曰雲峯

元統初卒年八十四集賢院劄謚文通先生有文集二十卷薦經兵火所存者六十餘篇

星源八景

錄四

龍井曉雲

華光殿東泉有靈下穴空洞神功冥當時忽見蒼虬精
年年簫鼓來相迎五風十雨今年好靈物不要人祈禱
非烟非霧騰清晨五色祥光煥晴昊

仙巖夜月

誰鑿太陰開四洞
蟾光照破人間夢
靈源千層石髓香
金雞一唱巖花動
白玉柱邊眠蒼虬
絳花橋下行青牛
我來絕愛讀書室
石圓水冷天風秋

北寺昏鐘

日斜一路紅闌干
日落四山蒼翠寒
雲深不見招提處
一聲兩聲起林端
遙度前溪聲欲絕
溪上漁舟撐未歇
衆鳥棲定樹頭雲
一僧歸踏松閒月

西湖水榭

蚬城誰築溪之涯層樓簇簇排人家兩畔春風好楊柳
一池霽月芙蓉花香與清風遠方覺污泥不染塵不着
小亭紅瞰碧波心著我中間看飛躍

拜岳鄂王墓

有公無此日再拜淚交頤大義君臣重孤忠天地知
鵠毛何太毒龍渡只如斯墳畔休留檜行人欲斧之
明休寧汪循後序云先生所學之大槩行已之大節平生不
可以告人者偶于此洩焉而不自覺

題治平寺

二十年前到治平青山歷歷記吾曾花因百五有孤注
寺過十三無一僧雲影長昏天外日榆烟誰換佛前燈
新安山水依然在不為空門管廢興

濠觀亭

魚不知子樂何必濠上觀子樂子自知月白秋江寒

內樂室

我有安樂窩春風方寸地收拾早歸來此中有深味

送董深山

并序

山深之號盖有取于艮止而求深於斯道者也一日訪予明經敢發此意題于諸吟卷之尾

洞口桃花易見源頭活水難尋欲知雲盡不盡須到山深更深

題祁門鄭氏墓

參天獨秀幾經春拜墓曾玄數百人隔隴不知誰氏塚
斷烟荒草卧麒麟

桃花馬

望夷宮裏失天真走入桃源避虐秦
背上落紅吹不起至今猶帶武陵春

元詩選初集卷二十四

謹案第十五頁後二行括爾特穆爾舊作徹里帖


木兒今改 十八頁後八行特穆爾達實舊作

帖木爾達實又阿魯舊作阿魯今改後倣此

四十四頁後一行達實特穆爾舊作答失帖木

兒今改





總校官候補中書 臣 吳紹澐

校對官編修 臣 馬啟

謄錄監生 臣 呂學